

Brevia

Clementis Papae XI.

Feol. ~~401~~ 403

Breve apostolicum pro immunitatibus Ecclesiae

S. a. d. 1712. 28 Julii.

BREVE APOSTOLICUM
Sanctissimi Domini Nostri
CLEMENTIS XI.

Pro Immunitatibus Ecclesiæ S. Anno Domini 1712.
Die 28. Julij emanatum, ab aculeis malevolorum
defensum.



59987-10 p.

Portenta rerum! Polonia illa Antemurale Christianitatis per Summa Oracula appellata: Illa Polonia, quæ nulla unquam Schismatum aut Hæresum parturit monstra: Illa Polonia, in cuius Libri Capite scriptum est: Rex Catholicus esto. Polonia Summorum Pontificum summa Veneratrix, Cleri sui non solum in Senatu, in Tribunalibus, in Ecclesijs, sed in quibuscunq: Consilijs exemplarissima Observatrix, Diæcesum, Collegiatarum, Abbatiarum, Parochiarum, amplissima Fundatrix: Redituum, Ornatum Ecclesiasticorum tam ex spolijs hostium, quam ex Fortunis proprijs liberalissima Auëtrix. Illa Polonia, jam hodie prohi dolor! hostiũ Christianitatis & monstrorũ fidei receptatrix, jam hodie Ecclesiæ sanctæ & Cleri sui tyrannica persecutrix, Bonorum Deo solennissimè dicarum infensissima spoliatrix & desolatrix; & tandem, acsi iam in profundũ venisset, Summorum Pontificum eorumq; monitorum formalissima contemptrix! Exiit nuper ex altissima in terris specula Vigilantissimi & Sanctissimi Ecclesiæ universalis Pastoris & Vicarij Christi, breve Monitorium & Paterna adhortatio, ne status secularis tã enormiter & despoticè dominetur in Clerum, nevé illi Pedagia, Gabellas, vectigalia, vel aliqua tributa, prout & Divinis & Ecclesiasticis & proprijs domesticis legibus sub pœna excommunicationis ipso facto incurrendæ statutum est, imponere audeat, prout in nuperno Consilio magno Varsaviensi, & gravius expressiusq; in Infructuario Thesauri Regni facta & imposita sunt: tum ut à tantis pressuris Bonorum Deo sanctificatorũ tandem Status secularis & militaris abstineat, aliàs excommunicationem, à qua nemo absolvere possit præter ipsum Summum Pontificem, nisi in articulo mortis, & salvâ restitutione, ipso facto incurrat. Quis putasset illam quondam devotissimam & sanctissimis Legibus moribusq; imbutam Gentem, tam salutaribus Clementissimi Patris sui monitis non obtemperaturam? Et ecce prohi dolor! salutare Pharmacum in toxicum versum! & ecce stomachantes & nauseabundi Hæreticis gustibus imbuti Stomachi, non tantum tam salubre remedium non acceptarunt, verum maiore Febri, maiori ardore, maiore sui ultimi sanguinis pauperũ hominum ecclesiæ subiectorum exarserunt. Sed quò ruis vesane heretico spiritu imbuta furor! Ais Summum Pontificem nil habere Dominiij vel Jurisdictionis in Statum Politicum, in Regna & Respublicas, in ijs præsertim, quæ sunt secularia. O deplorandam dementiam! Quis docuit insipiens Regna & Respublicas aliquando secularizare, aliquando spiritualizare; aliquando temporalia, aliquando æterna cogitare? Ergo dum genua flectis, & cum humili peccatorum tuorum Confessione pro absolutione recurris, interrogandus es, temporalisne an spiritualis accedas, temporaliane an spiritualia peccata habeas, subsisne an non Jurisdictioni! O gloriosissima quondam germina Aquilarum, nunc genimina viperarum! quis vos docuit fugere à ventura ira? Quis docuit, si Communionem admittis, excommunicari à

proximi & offensam Optimi Dei in se continent, ad illa vincula, quibus concessum est ligare & solvere, spectare cogantur] Quis quæso Personas Spirituales, Archiepiscopos, Episcopos, Capitula, Monasteria, secularisavit in Polonia? Quis illos Jurisdictioni seculari subiecit, ut in illos per seculares onera statui possint? Quis Bona Deo sanctificata in liberam prædam & rapinam militi Polono concessit? Quis in tantis in Cælum clamantibus injurijs ad Summum in terris, Vicarium Christi, Caput recursum facere interdixit? Quis Fidem & Ecclesiam Christi aliam fecit in Polonia, quàm ante Annos trecentos vel ducentos? O quisquis Lechæa de stirpe natus, tam perverso Hæreticis his temporibus teneris sensu, Lechicū retrò te confer in ævum, antiquos evolve Duces, lege Cromerum, Długossium, Joannem de Łasko. Vide & palpa, quid statuerit Vladislaus Princeps Anno Dñi. 1228. Quid Boleslaus Pudicus Anno 1252. item idem Anno 1258. Quid Casimirus Magnus Anno Dñi 1337. & 1354. Quid Vladislaus Jagello Anno 1413. & 1433. Quid Filius ejus Casimir⁹ in Añ. 1438. Quid deniq; vestigijs Patris & Avi inhærens Joannes Albertus Anno 1496. Quòd si verò & Historias & Statuta tot pijsimorum Regum ad manum non habeas, lege solum Compendium omnium Statutorum & Legum Polonarum per seriem Alphabeti in ordinem redactarū per secularem Senatorem Polonum, Castellatum Sanocensem Joannem Herbutum, ibi sub vocabulo *Spirituales*, Tit: de interditiis & excommunicationibus, pro injurijs Ecclesiæ reperies, quòd non solum Summus Pontifex, sed quilibet in sua Diœcesi Episcopus, pro injurijs sibi illatis, si intra tres dies non resarciatur damnum, excommunicare possit. Ibi simul, quid sit damnum, quid rapina, quid offensa Spiritualium, intelliges, & Civilibus & Canonice Legibus circumscriptum; leges obiectiones & solutiones, leges hanc ipsam in Exercitu toto ad Iniuriatorem deventionem. *Quia enim in turba vel Exercitu non facile potest sciri privata Persona, quæ committit rapinam; unde ne per hoc impunè spoliarentur Bona Ecclesiæ, illud statutum fecit provisionem, & voluit puniri illum, qui est Principalis in Exercitu, & qui habet potestatem ducendi & locandi Exercitum, ubi vult, &c. quia dat occasionem damni, faciendo stationem in Bonis Ecclesiæ &c.* Quæ omnia fusiùs adhuc extant in ipso Fonte, in Statutis ijsdem Regni antiquo Typo impressis apud Joannem de Łasko fol. 70. Sed dices, hæc sunt tantum Privilegia Regum, quibus sicut licuit tanta conferre Privilegia statui Ecclesiastico, sic licet ea auferre. O fallaciam! ô dementiam inenarrabilem! Transeat, quòd sint Privilegia Regum. [sed id aliter se habere mox probabo] Et tuæ Libertatis fundamenta, nonne sunt Privilegia Regum? cur tamen illa mordacitùs defendis? cur nec in minimo lædi permittis? cur Detronisationes minaris, si in minimo lædantur? Ergo ne tibi vis intaminata relinqui iura, & Ecclesiæ sanctæ contaminari? Sed falleris valdè, quòd sint Privilegia Regum prout Regum, sed Privilegia Regum in Fide S. educatorum & Fidei S. subiectorum. Privilegia non antè valida, quàm à Summis Pontificibus approbata. Cuius veritatis tot exempla habentur in Bullis Summorum Pontificum. Bonifacius IX. approbavit Friderici & Caroli Imperatorum Privilegia & immunitates statui Ecclesiastico datas, Anno Domini 1391. quæ iam olim approbaverat Honorius III. Anno Domini 1220. Quarum Bullarum extant Exempla in Statutis Regni antiquis, per Joannem Łasko Cancellarium connotatis. Gregorius etiam XIII. Anno 1570. 29. xbris. ad Stephanum Poloniæ Regem scripsit approbando Synodum, & laudando Regem, quòd. ab Archiepiscopo & Clero universo laudes eius acceperit. Privilegia in Jure Divino, Ecclesiastico & Civili, antequam Polonia Deum & Fidem nosset, fundata. Lege ius Divinum Levitici c. 5. Anima si prævaricans ceremonias per errorem in his, quæ Deo sunt sanctificata, peccaverit, offeret pro delicto suo arietem immaculatum de gregibus, qui emi potest duobus siclis iuxta pond⁹ Sanctuarij, ipsumq; quod intulit damni, restituet, quintā partē arietis, qui rogabit pro eo offerens arietē, & dimittet

quod comedit, & dabit Sacerdoti in sanctuario. Miles Polonus de sanctificatione Domini, non per ignorantiam, sed scienter & volenter quotidie vorans reddere tenetur, etiam si quinta pars ei condonaretur! Artaxerxes Rex Persarum licet Ethnicus, devicta & in potestatem redacta Judæa, Legem tamen Domini servare voluit, nam tale Ministris suis mandatum dedit, ut testatur Sacra Litera I. 1mo. Esdræ c. 7mo. Vobis quoque notum facimus de universis Sacerdotibus & Levitis & Cantoribus & Janitoribus & Ministris Domus Dei, ut vectigal, & tributum & annonas, non habeatis potestatem imponendi super eos. Et hodie licet Christiani & Catholici, tam graviter & enormiter audent prævaricari Legem Divinam, & quod gravius est, nec monitiones ferre volunt. Lege Jus Canonicum & Ecclesiasticum. Quod si verò Volumina illius non habeas, nec mihi, si citare vellem, credere velis. Quod si Conciliorum, & maxime Lateranensis sub Alexandro Tertio, Clementina, & aliorum Summorum Pontificum decisiones, quas hic allegare prolixum esset, non habeas, lege solum Concilium Tridentinum Sessione 22. c. 11. Ubi sic expressè decernit. Si quis alicujus Ecclesiæ vel piorum locorum fructus seu quascunque obventiones, quæ in Ministrorum & Pauperum necessitates converti debent, per se, per alios, vi vel timore incusso quocunque quæsito colore usurpare præsumperit, seu impedire, ne ab ijs, ad quos verè pertinet, percipiantur, is anathemati tamdiu subiaceat, quamdiu bona, res, fructus, redditus, quos occupaverit, Ecclesiæ eius Administratori non restituerit integrè, ac deinde à Rom. Pontifice absolutionem obtinuerit. Si itaque Christianus es, si intra obedientiam & reverentiam Sanctæ Ecclesiæ contineris, cur te peregrinum fingis, & Summum pontificem pro gravibus Ecclesiæ illatis iniurijs, anathemati te subijcere non posse asseris, cum pridem te eidem ipsa Bulla Cænæ Domini expressè subjecerit? Considera & perpende communi omnium populorum consensu & judicio acceptatum & observatum Jus Gentium & Nationum. Nonne apud omnes Gentes & Nationes majorem respectum & observantiam habent Bona spiritualia, seu potius ac si spiritualia, quam nunc in Polonia? Graviori longè & fame & rerum penuriâ premebatur Ægyptus, adeo ut omnia Ægyptiorum Bona pro sustentanda vita, & arcenda fame, debuerint Regi venundari, & servituti addici; sola tamen Sacerdotum quamvis falorum Deorum Bona erant libera, quinimo illis alimenta à Rege providebantur. Apud Romanos omnes Flamines Arioli, omnesque Sacrificuli, quomodo cum suis bonis ab omnibus publicis Tributis & oneribus erant liberi, videre est in Livio & alijs Romanis Historicis. De Turcis ipsis ac Tartaris certam ex illis, qui illic in captivitate erant, habemus notitiam, quod non tantum illorum supremi Pseudosacrorum præses Muphti, sed & omnes sacrificuli singulari afficiantur honore, & ab omnibus tributis & oneribus non tantum sint liberi, sed etiam Villa illa, in qua aliquis census pro Fanis seu Meczetis inscriptus est, licet sit Domini secularis, libera maneat ab omnibus oneribus. Quam ob causam & nostri Latini seu Græci ritus Christiani Turcicis illis fanis aliquid inscribere solent, ut bona illa, in quibus inscribunt, ab oneribus libera habeant. Hæretici ipsi licet Bonorum Ecclesiasticorum immunitati sint inimicissimi, & licet per Doctrinam illorum bona omnia Ecclesijs adempta & profanata sint, tamen prædicantes suos cum uxoribus & liberis & ditant, & ab omni communi onere liberos fovant. Sola Polonia, seu verius solus Polonus miles adeo acuit dentes in panem Christi, ut non sapidior illi videatur, quam in Bonis spiritualium, quem jam sanguine ipso & lachrymis pauperum hominum totaliter imbutum, vorare tamen non desistit. Et ita hoc liberum sibi esse asserit, ut nec moneri, nec arceri, nec ob pertinaciam & contumaciam excommunicari debeat. Pro defensione verò suorum illicitorum actuum, allegat Statutum Sigismundi I. Regis piissimi & zelosissimi, sub cuius Regimine Anno 1520. in Conventu Generali Bydgosciæ, laudata est Contributio Generalis, tam à spiritualibus quam secu-

ges & Respublicas Tributa in Clerum absq; omni consensu Summi pontificis & Cleri. Sed fallitur valde, & Hæretico more Scripturâ hanc Civilem legere & allegare videtur, dùm nec Historiam illius temporis revolvit, nec de consensu Ecclesiæ in volumine legum Ecclesiasticarum inquit: quod si faceret, informaretur & edoceret luculentissimè, quòd illo ipso Anno celebrata fuerit Synodus petricoviæ præfidente Mathia Drzevicio Archiepiscopo, in qua consensum est super ipso subsidio charitativo: quòd tamen ad effectum deduci non potuit, nisi post duas iterû sub eodem Archiepiscopo Lenciciæ celebratas Synodos Anno scilicet 1522 & Anno 1527. Tandem petricoviæ Anno 1530. in Synodo tertia hæc contributio decisa & ordinata, & à Summo pontifice Clemente VII. approbata, Exactoresq; assignati, prout expressè paret in Constitutionibus Synodalibus. Quod & superioribus annis, actum esse expressè patet in Voluminibus legum Anno scilicet Domini 1369. 4^{ta} Junij. [Cum exorta fuerint lites inter statum spiritualem & secularem Diæcesis Cracoviensis, simul Cracoviæ Rex Casimirus Magnus celebravit Comitia, & Bodzanta Episcopus Cracoviensis Synodum. Fuit etiam præsens, visitans protunc Diæcesim Cracoviensem, Iaroslaus Boguria Archiepiscopus Gnesnensis: & sic lis illa magis per Synodum, quàm per Comitia sopita est, ut testatur Joannes de Lasko Cancellar. Regni fol: 55. Et certum est, quotiescunq; illis antè inundationem Hæresis sanctioribus temporibus petrum est aliquod subsidium ab Ecclesiasticis, celebrabatur statim Synodus, & ad Sedem Apostolicam pro approbatione recurrebatur: ut testantur utrarumq; Legum Volumina.

Sed piscem adhuc objicis, qui carnem Ecclesiasticam voras, Statui Ecclesiastico, & ais: Christus Dominus Matt. 17. cùm venisset Capharnaum, accesserunt qui didrachma accipiebant, ad petrum, & dixerunt ei: Magister vester non solvit Didrachma? ait etiâ: Et cùm intrasset domû, prævenit eum Iesus dicens: quid tibi videretur Simon? Reges Terræ à quibus accipiunt tributum vel censum? à Filiis suis, an ab alienis? Et ille dixit: ab alienis. Dixit illi Iesus: ergo liberi sunt Filii; ut autem non scandalisemus eos, vade ad mare, & mitte hamum, & eum piscem, qui primus ascenderit tolle, & aperto ore eius invenies statuerem; illum sumens da eis pro me & te. Et infer inde: quod si Christus & petrus solverunt tributum, seu commune illud didrachma, cur Ecclesiastici ad præsensolvere non debeant? O quàm rude & Evangelij sancti ignarum illud seculum quo tantæ immunitates & libertates dabantur, Ecclesijs & Ecclesiasticis, ut hunc textum ignoraverit! Modo verò Lutheri & Calvinii temporibus, quàm illuminatû, ut & ipso Evangelio uti possit ad opprimendam & spoliandam S. Dei Ecclesiam! Sed reflectas te velim benè, super verba omnia & circumstantias allegati textûs, & considera primo, quòd Capharnaum fuerit Civitas ac si domestica Iesu Christi, quam & suam vocat, ut ait idem S. Matt. c. 9. Ascendens in Naviculam transfretavit, & venit in Civitatem suam; adeoq; quòd in illa civitate non pro Sacerdote secundum ordinem Melchisedech, sed pro Incola & Filio Iosephi habitus fuerit. Considera 2do. quòd nihilominus non impositivè, non extorsive, non vi & violenter postulatum fuerit illud Didrachma, sed interrogatus solummodò petrus, an solvat Magister. Considera 3tio. quòd decisum fuerit à petro & confirmatum à Christo, à Filiis non debere pendi tributum [ô quàm verò magis à patribus!] sed tantum ut non scandalisati fuissent pharisæi, qui quærebant semper occasionem capiendi Dominum in sermone, dictum petro: vade &c. Considera 4to quòd licet dictum esset, ut non scandalisemus eos, non tamen ex proprio peculio, non ex pecunia sanctificata Deo, & oblata à pijs hominibus, cujus curam habebat Dispensator Iscariotes, acceptum esse aliquid pro illo vectigali: non ex censu pauperum hominum, Christo aut ejus servis subiectorum: sed ex publico mari. Et tandem quòd summum est, & omnibus inimicis Ecclesiæ cōsideratu dignum, considera, quòd licet Christus Dominus nondum fuerit declaratus & agnitus Summus

præsentientes magis esse spirituales quam seculares personam Christum: non despotice illi quidquam imponebant, non executiones mittebant, sed civilissime interrogabant petrum: Magister vester non solvit didrachma? Id est, solvitne an non, tenerne solvere an non? Et Christus quæstionem præveniendo, & personam suam non clarificando dicit Petro: ut non scandalisemus &c, Urges adhuc objectiones, & ipsum S. Paulum ad Rom. 13. scribentem objicis Matri tuæ Ecclesiæ, & ais cum S. Paulo, quod omnis anima Potestatibus sublimioribus subdita sit, non est enim Potestas nisi à Deo. Et ex hac universali propositione inferis, ut & animæ spiritualium tuæ potestati militari subditæ sint. Verum quantum erras, recollige te & palpa, sublimiorem esse Potestatem spirituales, cui & Claves Regni cælorum, & potestas ligandi & solvendi in terris tradita est. Lege eundem S. Paulum ad Hebræos c. 13. scribentem & adhortantem: Obedite Præpositis vestris, & subjacete eis, ipsi enim pervigilant quasi rationem pro animabus vestris reddituri, ut cum gaudio faciant hoc, & non gementes; hoc enim non expedit vobis. Quod autem ad Romanos seculares de seculari potestate scribit, utinam sapes & intelligeres! utinam sublimiori potestati subditus esses! profecto te oneribus non subduceres, quæ antiquitus libenter & reverenter ferebas; & ea Regibus, tum & Patribus tuis non imponeres: certe in Conventibus & Concessibus Generalibus non desudares in tuis tuorumque amicorum Bonis liberandis, & spiritualium opprimendis. O quam pulchrum & salubre esset, si potestati & Ecclesiasticæ, cui animam tuam subdidisti, & Regali Principis tui subditus esses! certe hoc Sanctissimum Breve Apostolicum non ita ventilares & blasphemares, certe non quæreres, an Sanctissimus Pontifex excommunicare possit illos, qui statui Ecclesiastico violentias inferunt, qui eundem despotice tributorum impositionibus aggravant, & quod gravius adhuc est, absque ulla saltem impositione, violentis rapinis, spolijs, invasionibus, pabulationibus, & multo nomine vocitarum collectarum extorsionibus premunt ac opprimunt; certe non assereres, Sublimiorem Christi & Vicarii ejus in terris potestatem, nihil habere juris in tuam injuriosam statui Ecclesiastico potestatem. Quare siquid adhuc rationis & sensus interni in te est, intra in te ipsum, & quodsi te nihil ea horum, quæ palpabiliter allegata sunt, movent; quodsi nec Divina & Ecclesiastica, nec Civilia & domestica, nec ipsa Jura Gentium quid valeant; quodsi illa forma antiqua, quæ veteres piissimi Reges & Regnicolæ inscribebant Bona sua Deo & ejus Ecclesijs, [Offero & reddo Deo hoc quod in charta est scriptum, in remissionem peccatorum Parentum & filiorum meorum, ut hoc sustentati Sacerdotes, Domino Deo serviant, Sacrificia Missæ celebrent, orationes absolvant. Si quis sibi hoc usurpare, & ab Ecclesia alienare veller, in Judicio Dei respondebit, ut sacrilegus. Quam formam expressè videre est in Baronio Año Domini 843. & in Vitis Episcoporum Vladislaviensium] non perstringit cor? quodsi nec illa consideratio timorem incutit, quod grave sit sacrilegium, de pijs oblati ex Altari aliquid rapere, vel calicem sacrum, in quo pretiosissimus Sanguis Christi consecratur, profanare; & quod non sit minus sacrilegium de granarijs, horreis, allodijs, longè majora rerum pretia usurpare & extorquere: [nam æqualiter hæc oblata & sanctificata sunt Domino, & sunt pretium Sanguinis ejus; quem si quis dispergit, jure dicere potest cum Judæis crucifixoribus, Sanguis ejus sit super nos & super Filios nostros in condemnationem æternam.] Quodsi universale Theologicum & Fidei Sanctæ axioma, non remittendum peccatum, nisi restituatur ablatum; quodsi excommunicatio ipsa risui est, & blasphemiae adhuc obstrepant voces, non impedituram excommunicationem ad benè edendum & bibendum. Quodsi nec ultimum, terribile absque dubio, vitæ punctum, nec ipsa ab illo pendens æternitas moveat: moveat saltem politica & evidens reflexio, quinimò demonstratio, nullam domum, nullam personam, de rapinis Ecclesiæ diu exultasse, nec tertium Hæredem illis unquam gavissimum esse. Moveant præterita cum præsentibus collata tempora

O quam felix fuit hoc Regnum, quamdiu intaminata Ecclesiae jura relinquebat, quamdiu proprijs viribus & sumptibus, non Ecclesiasticis bellabat: quamdiu pro injurijs Ecclesiae illatis puniebat & excommunicabat injuriatores, quinimò sacris interdicebat locis illis, in quibus injuriæ patratae erant! O quantum protunc timorem & æstimationem sui vicinis incutiebat Gentibus, quantum fines & limites suos dilatabat, quantis laudibus & encomijs à Sede Apostolica & à vicinis Monarchis celebrabatur! Nunc verò quàm primùm post infelicem Hæreseos admissionem, post primam ex occasione Nobilis Krupka Przecławski excommunicationis interpretationem, & vilipensionem, villæ Spiritualium numerari: quàm primùm in Conventibus generalibus, clamores & vociferationes contra Ecclesiastica bona invalescere, quàm primùm bona hæc Deo dicata in rapinam & prædam licentioso militi cedere ceperunt: recolligat se, quisquis prudens, quid honoris, quid emolumenti accesserit? nonnè tot amissæ terræ, imò Provinciæ? nonnè opprobrium, subsannatio & illusio facti sumus vicinis nostris? nonnè continua & nunquàm ferè cessans calamitas invasit hoc Regnum? & dicere, imò assecurare audeo, non cessaturam in hoc Regno calamitatem, non cessaturas dissensiones & opprobria vicinorum, nisi cesset oppressio bonorum Spiritualium, & tributorum ex illis usurpatio. Ergo Patriæ tuæ, ergo tui ipsius conservationis rationem habeas, si sapias, necesse est. Sed dices, ergo rapere non liceat, sed statuere tributa, Reipublicæ, jurium suorum Dominæ, etiam super Ecclesiastica bona, imò & super personas cur non licet? Interroga Patres tuos, & annuntiabunt tibi, Majores tuos, & dicent tibi: imò totum Canticum Moysis Deutor: 32. lege, & non interrogabis: aliàs interrogandum esset, cur Altaria & Sancta Sanctorum spoliare non liceat? cur dies Sabbathi celebrandus? cur Parentes honorandi? & cur nihil alienum concupiscendum? Siquidem, ut jam sufficienter tibi deductum est, & Divinis, & humanis, & externis, & domesticis præceptis cautum est, ut bona Spiritualium sint immunia, & libera ab omni onere, & soli subiecta Vicario Christi, Summo Pontifici, nec ullum in illa jus potestati laicali relictum esse. Rempublicam verò & sui & suorum jurium Dominam esse, nemo quidem est, qui ambigat: sed iura Ecclesiae distincta esse à juribus Reipublicæ, & Rempublicam Ecclesiae, non Ecclesiam Reipublicæ subiectam esse, fatendum est. Cujus infallibilis veritatis ut recentem semper haberet memoriam Posteritas, omnium & singulorum Privilegiorum suorum antiqua Respublica talem clausulam haberi voluit: Juribus Ecclesiae per omnia salvis. Quomodo autem maneret Jus Ecclesiae salvum, si Juri Laicali subiectum esset, & si potestati Laicali licitum esset pro libitu suo onera & tributa illi imponere? Quod si verò Subsidia charitativa tam intra quàm extra Poloniam semper in gravibus necessitatibus Regnorum subministrata fuisse ab Ecclesia asseras: Respondeo, non solum pro necessitatibus gravibus Reipublicæ, sed pro privatis etiam pauperum hominum alimentis, non solum ex Bonis, sed & ex Altaribus & ex Aerarijs Ecclesiasticis conferenda esse licitè Subsidia charitativa; sed non impositivè, non extorsivè, non per militares executiones, sed per consensum liberum Synodalem, & per approbationem (sine qua non) Summi Pontificis. Quam praxim & observationem præteritis seculis sacrosanctè servatam esse, Legibus utiq; Patrijs deductum est. Ultimum tandem admoveo arietem, & ais, neminem saltem excommunicandum, nisi citatum & monitum, & servatis præscriptis Juris gradibus. Verùm si penitiùs Jura Canonica perpendas, si in notorijs & ijs, in quibus ipso facto incurritur Excommunicatio, quæ singulis annis die Cene Domini in Ecclesijs omnibus publicatur, nullos requiri gradus intellexeris; si ipsa Statuta Regni, tit. *Spirituales*, ut jam dictum est, exactè & consideratè revolveris, & stylum & sensum mutare cogeris; & à SS. Domino nostro, nisi resipueris, & à coeptis illicitis destiteris, prout te Paternè monet, justè fulmine anathematis te percussum esse fateberis. Si verò in indurato corde nihil hæc omnia proficiant, si & Patriam & animam perire malis, quàm sensum contra Ecclesiam Dei præconceptum immutare: nullà in æternis sensibus compassione dignus eris, & ridebit ille in interitu tuo, cujus vincula dirumpis, cujus vocationi, legibus & præceptis resistis. Vos verò mactis animis Celsissimi Illustrissimi & Reverendissimi Ecclesiae S. Principes & Proceres! & nisi ista nunc Væ! audire velitis, Summi ac Beatissimi Patris vestri vocem audite: Bona Deo sanctificet & administrationi vestræ commissa ab omnibus injurijs & pressuris vindicet; con-

